

ساتو توھن ساتو جالن

سورت یغ فرتام

لفة فطاني

پهونځ

کډ پ.٣. ١١٠٥ ځونډیوځ ګرځګهه ۱ ١٠٢١١

اتوران مٿاجي انتوق تيف ۲ فلاجران ماسيغ ۲

1. بچاله فلاجران تو اچف کالي هيٺڪڏ چرف.
2. اميٺله ڪرتس جواڻن فلاجران تو، هق دوق سليف دسبله دالم ڪوليت بلاڪڱ، لس توليسله جواڻن هق بتول ايڪوت اتوران هق دي سوروه.
3. بوبوهله ڪرتس جواڻن تو دالم سمڦول، تيفيل سٽيم، لس هنتر ڪڏ:
เพื่อมนุษย์ ผู้ ป.ธ. 1105 ๑๐211 ๑๐211
لس เพื่อมนุษย์ نق هنتر ڪليق سڪالي دغن مرکه.
4. بويه هنتر ڪرتس جواڻن لس ساتو ۲، اتوا ڪالو نق هنتر سڪالي ڪوس ڪرتس جواڻن 1 - 6 فون بويه.
5. بيلا تريما چوڪوف ده 6 فلاجران تو، เพื่อมนุษย์ نق هنتر فول (ساتو نوهن سانو جالن، سورت بلغ ڪدوا، انتوق نق سمجوع مٿاجي لاکي.
6. بيلا مٿاجي هاپيس ده دوا بواه سورت تو، (پايت 12 فلاجران)، เพื่อมนุษย์ نق هنتر ستافڪت (ปฐมาภินิเวศ)، سڪالي دغن هديه.

فلاجران ۱

چارا حال توهن یغ سا

۱۰ توهن هق سجاتي اد سا ساج. دباله توهن یغ سا. برهالا ۲ اتوا دیوا ۲ هق اورغ دوق لوجا گنتي توهن نو، فلسو، تاترفاکي ساج. فلاجران نبي داود دالم کتاب زبور کات اورغ بودوه ساج هق براني کات توهن تاد. لاثیت دغن بومي سکالي دغن ابسي دي، سمرت متھاري، بولن، بیتغ ۲، فس مخلوق لاین ۲ لاکي، سمو تو جادي دالبل منجوق کات توهن اد فس توهنله هق جادیکن دي. سمو لراکارا ۲ تو فون منجوق کات توهنله هق یغ مهاکواس لاکي مهاملیا. ایات هق فرنام دالم کتاب تورات بري تاهو کات:

۱۱ مولا ۲ سکالي توهن بري جادیکن لاثیت دغن بومي. ۱
لفس تو اد ایات ۲ هق نق هوري بري کهور چرف لاکي ایات هق فرنام تو، کات توهن جادیکن لاثیت دغن بومي تو دالم ماس انم هاري، سروف تفسیر دباوه ني:

۱۲ فد هاري یغ فرنام توهن کات: جادیله چهیا هق چره !
چهیا فون تیمبول سلالو. فس توهن نمفق کات چهیا تو مولیق ده. دي فون بهاکي هق چره دغن هق کلف. ماس چره توهن لفلکیل سیاغ هاري، ماس کلف فول دي لفلکیل مالم.

“ فد هاري یغ کدوا توهن کات فول: جاديله ساتو سکاتن، نق بهاکي ایر برې دې دوق ددوا تمفت ! نس جاديله بالس تو. سکاتن تو دوق دتغه، انتارا ایر باوه دغن ایر اتس، انتوق نق برې بوليه نمفق لاغیت دغن کمليان دې.

“ فد هاري یغ کتيکد توهن کات: ایر هق دوق دسبله باوه، دودوقله ستمفت نس تیمبولله تانه هق کریغ ! نس جادي بالس تو. تانه هق کریغ تو توهن لفگیل دارت. ایر هق دوق ستمفت تو، توهن لفگیل لاوت. نس توهن نمفق کات سموا تو مولیق ده. نس توهن کات فول: برې تیمبولله اتس بومي سموا تومبوه ۲هن، ایکوت جنیس دې. نس نیمبول سلالو سمرت رملوت، ساپور ۲ران دغن فوهون ۲کابو.

“ فد هاري یغ کاتمفت توهن کات: جاديله سموا ایبو چهيا دلاغیت، نق بهاکي سباغ هاري دغن مالم. بالس توله توهن برې جادي ایبو چهيا دوا بوتیر هق بسر، بایت متهاري دغن بولن. هق بسر سکالي تو، توهن برې دوق مرینته سباغ هاري. نس هق کدوا تو، بایت بولن، توهن برې مرینته سبله مالم. نس بینتغ ۲فون توهن برې جادي جوکد. توهن لتق ایبو ۲چهيا تو دلاغیت نق برې چره کا بومي.

“ فد هاري یغ کلیم، دغن فرکتان دې جوکد، توهن برې جادیکن سموا ابکن دغن بوروغ ۲کنف ۲بغا.

۱۰ فد هاري یغ کائیم توهن کات: نیمبولله اتس بومي
سموا بناتغ ۲ هق دوق ددارت، بر اتوا کچیک فون، ایکوت
بلسا ۲ دي. فس جاديله بالس تو. هق سود سکالي، توهن بري
جادیکن مائسي. (چارا حال مائسي تو اد هوبوغ لاکي
دفلاجران ۲.) بالس توله، سموا مخلوق هق توهن بري جادیکن
تو سوده سيف بلاک ده. لفس تو، توهن فرهاتي تیغوق سموا
هق دي بري جادي تو، فس دي برکنن سوفکوه، کات مولی
بلاک ده.

۱۱ فد هاري یغ کتوجوه توهن برهنتي درفد کرج تو.
توهن فون کات: سلامت سجهتراله اتس هاري یغ کتوجوه. اکو
لتق هاري یغ کتوجوه تو بري سوچی انتوق اکو.

۱۲ توهن یغ مهاکواس سجاله هق بولیه بري جادیکن فرکارا
بسر لاکي مولی سروف دنیا کیت ني. سبب توله، مخلوق هق
توهن سروف مائسي کیت ني مستي کنا کاجغ سهیلکد بولیه تاهو
هق سوفکوه چارا حال توهن. سیافکه توهن یغ مهاتیغکي تو؟

۱۳ بالس مانکه مائسي بولیه تاهو هق سوفکوه چارا حال
ذات دغن صیفة ۲ هق توهن تو ؟ مائسي کیت تالیه تیغوق
توهن، تافي توهن سندیري بري تاهو ده کا مائسي چارا حال
صیفة دي کو کتاب ني ۲، فس بري پات دالیل ۲ صیفة ۲ تو دغن
فربواتن دي. دالم فلاجران ني، کیت نق رویت صیفة ۲ هق
مستحق ساج، تافي صیفة تو اد باپی لاکي.

۱. توهن دپاله هق یل هیدوف، تافی دې تا'اد
توبوه، تا'اد روف، تا'له نملق دې.

۲. توهن تو ککل. دې تا'اد اوال، تا'اد اخیر، فس
دې تا'برابره سملې سلام'ن.

۳. توهن دپاله یل مهاکواس. دې دوق مرسته اتس
سموا عالم. توهن تیلوق بلاک، فس تاهو بلاک. دمان' فون،
توهن اد دسبتو سعمور'، سروف نبې دا'ود رویت کات:
« یا توهن، اکو نق کي کا مان برې لفس فد مو ؟
نق لاري کا مان تا'سیر برې دوق دافن مو ؟ »
سایت نو، کیت تا'له سوسوف اف سکارا درلد دې.

۴. توهن دپاله یل مهاسوچی، سبب توله توهن بنچي
کا دوسا' مانسي کیت. دغن سبب دوسا نو، توهن تا'ترېما
مانسي کیت هق بردوسا.

۵. توهن دپاله یل مهاعادیل. سموا هق توهن بوات
نو بتول بلاک. حکومن دې فون عادیل. سبب توهن دې عادیل
لاکي سوچی، سایت نو دې متي کنا حکوم مانسي کران دوسا.

۶. توهن دپاله یل مهاکاسیه. دې دوق کسباغ بلس
کا کیت لس نورون رحمة اتس کیت سعمور. سوغکوه فون توهن

هابيس ۲ بنچي کا سموا فرکارا جاهت هق ما'نسي بوات، نافي
دي کاسيه کا کيت لاکي. سبب توله توهن چادغ ساتو جالن نق
بري ما'نسي کيت هق بردوسا بوليه سلامت درفد حکومن.

"• توهن کاسيه کا ما'نسي کيت سموا، نا'کيرا توا مودا،
بتينا جنتن، نق بري کيت سلامت. سابيت توله دي سوروه کيت
توبه فس ماسوق دوق باوه فرينته دي. نافي هق مستحق سکالي،
توهن سوروه کيت کاسيه کا دي دغن سفتوه هاتي.

"• توهن کاسيه کا کيت. فس کيت کاسيه کا توهن کا دق ؟

فلاجبران 2

چارا حال تو* ادم دغن سیتی حوا

۱۰ مانی هق مولا ۲ سکالي ددنيا ني، يانیٔ تو* ادم دغن سیتی حوا، لس کیت سمو جادي کتورونن دي. مانی سمو، کنف ۲ اورغ، دي کنا برانق ماري کا دنيا جادي بودق دولو، تافي تو* ادم دغن سیتی حوا نو. دي تا* اد اورغ برانق کا دي سروف اورغ ۲ لاین. توهن سنديري بري جادېکن دي.

۱۱ بیلا توهن بري جادېکن لایٔت دغن بومي، سکالي دغن مخلوق ۲ لاین، بري سيف بلاکد ده، لس سوغ انتوق مانی بوليه دودوق، لد هاري یلغ کا* نم تو جوکد، باروله توهن منجادیکن تو* ادم بوات دغن دبو تانه، لس همبوس نفس دهيدوغ ادم بري دي هيدوف.

۱۲ لس تو توهن، رتي هق دوق مرینته اتس سمو تو، کات: تا* مولي مانی کنا دوق سئورغ. اکونق بوات بري کا دي فنولوج هق سوغ فاتوت دغن دي. لس تو توهن بري تو* ادم جندرا، تا* کابر اف سکارا. تکه دي دوق جندرا تو، توهن امبیق تولغ روسوق هق تو* ادم سفونتوغ، لس کاتوف روسوق دي کلیق بري سروف سديا. تولغ روسوق هق دي امبیق توییت تو، توهن بوات بري جادي اورغ بتينا سئورغ، نق بري جادي کو اورغ جنتن.

“ توهن لتق دوا اورغ تو، يايت تو'ادم دهن سيني حوا،
بري دوق دساتو كيون هق اورغ ففكجل عدان. فس توهن بري
تومبوه ديتو فوهون كايو كنف؟ جنيس هق سوبر فس هق نملق
موليق. بواه دي فون سدف ماكن.

“ توهن روبت كا مائسي تو كات: مو بوليه ماكن بلاك
بواه كايو سموا دالم كيون ني، ملينكن سفوهون ساج، هق مو
تاليه ماكن بواه دي، يايت فوهون هق بوليه بري تاهو بايك
دغن جاهت. كالو مو ماكن بواه تو، تنتو مو نق ماتې.

“ تافي، كفلا هيليس تو، هق جادي هومبي سموا هق
جاهت، هق بوهورغ، دغن هق ساه، دي تو مروف جادي اولر،
ماري نق تيفو مائسي تو. دي كيچيق كا سيني حوا كات: مو
بوليه ماكن بواه كايو هق توهن لارغ تو، سبب بيلا مو ماكن ده،
مو نق بوليه تاهو هق بايك دغن هق جاهت. مو نق جادي بيچق
سروف توهن. بالي توله هيليس تيفو اورغ بتينا تو فس مائسي
دوا اورغ تو فون سكلېغ لفكر فرينته توهن، ماكن بواه كايو هق
توهن لارغ ده تو.

“ سايت توله دوا اورغ نو جادي اورغ بردوسا ده. دوسا
تو معنان، بوات درهاك كا توهن، تاسير دوق باوه فرينته دي.

۹۰ با دې ماکن بواه کايو دلوھون ھق بولې برې ناھو با'ېک
دغن جاھت تو، تو'ادم دغن سېتي حوا کابر سلالو کات دې
دوق تلنجغ، لس سدر ده کات دې نې اورغ بردوسا سبب دې
بوات درھاځک ده کا توهن.

۹۱ سولکوهن توهن ناھو ده ھق تو'ادم دغن سېتي حوا
بوات تو، نالې دې تاں تو'ادم حال ۲ فرکارا تو. لس تو توهن
تاں کا اورغ بتينا نو ټول، کات: اف ھق مو بوات نې؟ اورغ
بتينا فون جواب: سبب ھېلېس ټېلو اکو، سايت تو اکو ماکن
بواه ھق توهن لارغ تو.

۹۲ سبب ټوله توهن حکوم کا اولر تو، کات: سبب مو بوات
بالس تو، مو ساج، دالم سموا بلسا بناتلغ ھق اد، نق کنا سومغه
بالس نې: جق دماس لانې مو نق برجالن ھيريت فروت، ماکن
دبو تانه سعمور. لس توهن کات کا ھېلېس لاکې: اکو نق
برې مو دغن اورغ بتينا جادي سترو. کتورونن مو فون دغن
کتورونن دې نق جادي سترو سعمور. لس کتورونن اورغ بتينا
نق کاتوق کفلا مو، لس مو فون نق کتيي ټومېت ھق دې تو.
بالس ټوله توهن کات.

۹۳ لس تو، توهن امبيق کوليت بناتلغ بوات فکايڼ انتوق
تو'ادم دغن سېتي حوا، سبب دوا اورغ تو براس مالو، لس
تاسير دوق دالڼ توهن. ما'نسي ھق بوات دوسا لس ھق براس

مالو، تافي بناتغه، هق تا'بردوسا، هق كنا ماتي، انتوق بري بوليه امبيق كوليت دي بوات فكاين، نق تودوغ ما'نسي هق براس مالو کران دوسا تو.

« کيت سوما هق جادي انق چوجو تو'ادم، اد دوسا ده سروف تو'ادم جوکد. فس دوسا تو کيت نا'له سوسوف کا توهن. رویت سچارا بنديفن، کيت جادي سروف اورغ تلنجغ دفتدغن توهن، فس سايت تو کيت مستي كنا اد فرکارا هق نق بوليه بوات تودوغ دوسا کيت تو.

« سايت دوسا هق تو'ادم دغن سېتي حوا نوله، توهن همبت دي توييت دکبون عدان. کران دوسا تو جوکد، توهن بري بومي ني کورغ حصن، فس سايت تو، ما'نسي كنا کرج برت سوغکوه، سهفکد توييت ريغ دغن تيتيق فلو، انتوق نق چاري ماکن، باروله تانه نق توييت حصن.

« دسجاره تو'ادم دغن سېتي حوا ني، کيت نطق کات، سايت دوساله بومي ني كنا حکوم جادي فونه ده. فس سايت دوسا جوکد، ما'نسي کيت سفکغ جا'وه درفد توهن. فس، کران دوسا تو، ما'نسي کيت سوما كنا سوسه، كنا ساکيت، فس كنا ماتي. سوما فرکارا تو ماسوق ده دالم دنيا کو' جالن دوسا تو. معنان، سوما فرکارا هل توهن بري جادېکن، فس کات موليق تو، فونه ده دغن کران دوسا ما'نسي.

”اد ابات دالم كتاب هق كات:

1 مولا ۲ دوسا تيمبول دالم دنيا دما'نسي ساتو اورغ ساج،
يا'يت تو'ادم. لس نو، حكوم ماتي فون تيمبول ماري سبب
دوسا تو'ادم س'ني. لس تو كموا م'نسي كنا ماتي، كران
ما'نسي سموا تو اد دوسا دنداهن توهن. ۱

”كيت سموا جادي انق چوچو تو'ادم بلاك. كيت سموا
فون سكيلغ لگكر لرهنه توهن ده سروف تو'ادم جوكد. لس
سايت سموا اورغ اد دوسا سروف تو، كيت سموا براس مالو
دوق داهن توهن، سروف تو'ادم جوكد. روهت سچارا بنديغن،
كيت سروف اورغ تلنجغ دنداهن توهن، لس سايت توله، كنا
اد لركارا هق بويه بوات تودوغ دوسا كيت نو.

”سولگوه فون م'نسي كيت تا'سوغ ده نق بويه ماسوق
مفهادف توهن، اتوا برهوبوغ دهن دي، دهن كران دوسا تو،
تافي توهن كاسيه سولگوه ۲ كا سموا م'نسي. سبب توله، توهن
چادغ ده جالن سلامت هق بويه بوات تودوغ دوسا م'نسي.

”هوبوغ مفاجي لاکيله، سبب دفلاجران ۲ هق داهن اد
هورې چارا حال جالن سلامت نو.

فلاجران 3

چارا حال قبيل دغن هاييل

۱۰ "تو'ادم دغن سيني حوا تو تا'ماري کا دنيا کو' جالن برانق، دق. توهن سنديري بري جاديکن دي. تالي، اتق سولوغ هي تو'ادم دغن سيني حوا تو، نام قبيل، بودق هي مولا ۲ سکالي برانق ماري کا دنيا، لس، لفس لد قبيل تو، ادیق دي نام هاييل.

۱۱ "تکه دوا برادیق تو دوق کهور بر کهور بر، کدوا تو ترتاریق هاتي دغن کرج هي باف دي دوق بوات، تالي فکرجان هي دوا برادیق تو برکتن ماسیغ ۲، تا'سروف. قبیل سوکد برچوچوق تانم. هاييل فول سوکد لیرا کمبیغ بیريغ.

۱۲ "بیلا قبیل دغن هاييل بر ده، سوغکوه فون فکرجان دي تا'سروف، تالي دوا برادیق تو فکغ کا توهن هي سجاتي، يا'یت توهن بیغ سا. کدوا ۲ تو فون هارف کات توهن نق تورون رحمة اتس دي لس نق تريما دي. کدوا ۲ تو فون باوا' بارغ ماري ماسیغ ۲ نق سره کا توهن.

۱۳ "قبیل فون سره کا توهن حصن بارغ ۲ چوچوق تانم هي دي کرج. تالي هي هاييل سره تو لا'ین سوغکوه. هاييل سمليه سيکور بیريغ مودا هي سولوغ هي برانق دالم کاون بیريغ دي تو، بوات قربان سره کا توهن.

۱۰ توهن لون تريما بيرغ هق هاييل قربان سره کا توهن تو، سبب هق تو بتولن دغن کهندق توهن. سايت تو، ديرې هاييل سنديرې فون، توهن تريما جوکد. تافي توهن تا تريما، تا امبيق فادول سيکت هابوق، بارغ هق قبيل سره تو، سکالي دغن ديرې قبيل.

۱۱ قبيل لون نا يک فراسان دغکي سبب توهن تريما هاييل سکالي دغن قربان دې تو، تافي تا تريما قبيل سکالي دغن بارغ ۲ هق دې سره تو. قبيل نا يک موريه سوغکوه ۲، سهيگد دې بونوه ادیق دې هاييل. دسيتوله مولا ۲ تيمبول بونوه لمبونوه سام مانسي هيلکد سملې کا ماس لانې فون. سبب توله توهن جاتوه حکومن برت کلد قبيل، برې جادي سوسه سفنجلغ هيدوف دې.

۱۲ يفکالي اد اورغ هق براس نق لهم برې کهور چرف لاکي، سبب اف توهن تا تريما بارغ ۲ هق قبيل سره تو، سکالي دغن ديرې قبيل سنديرې، تافي ديرې هاييل سکالي دغن هق دې سره تو، توهن تريما.

۱۳ کدوا ۲ برادیق تو فرچاي سروف کات اد توهن بلغ سا. کدوا ۲ تو هارف سروف، کات دې نق بوليه هاسوق مفهادف توهن، لس توجوان کدوا ۲ تو لون سروف، نق برې توهن برکنن کا دې. تتافي بارغ هق دې فيليه نق سره کا توهن تو، تا سروف!

۹۰ دالم چريتا ني کيت بوليه تاهو کات، کالو نق بري توهن تريما کيت. سکت کيت لرجاي کا توهن بلغ سا ساج تو، تافادن. لس کالو کيت نق بري بوليه ماسوق مفهادف توهن ابکوت فيکيران کيت سنديري فون تافادن لاکي. توهن تافاد تريما جوکد.

۹۱ توهن تريما هابيل سکالي دغن بارغ هق دي سره تو، کران هابيل سمبه کا توهن دغن رنده هاتي، دغن تافاد هارف کا ديرې دي سنديري سيکيت هابوق، تافي دوق هارف سمات ۲ کا کاسيه کياغ بلس هق توهن. لس هابيل سره کا توهن بارغ هق توهن برکنن، پائيت سیکور بيرغ مودا هق سمبله جادي قربان ده. کالو کيت نق بري توهن تريما کيت سروف هابيل، کيت کنا سمبه کا توهن دغن هاتي رنده، لس کنا سره کا توهن بارغ هق توهن برکنن تو، سروف هابيل جوکد.

۹۲ سبب اف توهن تافاد برکنن کا ديرې قبيل سکالي دغن بارغ هق دي سره تو ؟ سبب بارغ ۲ هق دي سره کا توهن تو، حصن کرج ۲ قبيل سنديري، لس منجوق کات قبيل دوق هارف کا کرج ۲ دي سنديري تو انتوق نق بري توهن بوليه تريما دي. معنائ، هق قبيل هارف تو، بوکن دي هارف کا توهن، دق، تافي دي برکنتوغ دغن فکرجان دي سنديري انتوق نق بوليه بالسن، سروف دغن بايق اورغ هق دوق هارف کا عملن دغن کيجيکن دي.

۱۴۰ " ليل ليله ايكوت هاتي دي سنديري، فركارا ۲ هق دي نق سره كا توهن نو. تالي هق ليل ليله نو، توهن تا برکنن، سبب تا بتولن دهن كهندق توهن. كيت كنڤ ۲ اورغ لون كنا ليله جوكد، كيت نق تورو جالن هق توهن كه، اتوا نق تورو جالن كيت سنديري، سروف ليل. توهن تا لقا، دي بري كيت ليله.

۱۴۱ " توهن بري تاهو ده كا ماني فركارا مان هق دي برکنن نق بري ماني كيت سره كا دي، انتوق نق بري توهن بوليه نريما كيت، بايت فركارا سروف هق هابيل سره ده نو. تالي كيت سموا تاهو كا دق لاکي، فركارا مان هق توهن برکنن نو، هق ماني كيت ماس لاني كنا باوا كې سره كا توهن، انتوق نق بري توهن بوليه نريما كيت ؟

۱۴۲ " جوابن تو اد رويت دالم فلاجران ۲ دافن.

فلاجران 4

چارا حال نبي نوح

۱۰ دالم فلاجران 3 نو، کيت تاهو ده چارا حال انق تو'ادم
 هق مولا ۲ برانق ماري کا دنيا، پايت قبيل دغن هابيل. لفس
 نو، براتوس ۲ تاهون لامن، باروله سملي کا ماس نبي نوح لاهير
 ددنيا.

۱۱ دالم ماس براتوس ۲ تاهون توله، ما'نسي تيمبول ماري
 كهوړ ۲ بايق لاکي دالم دنيا، هيلکد سملي جادي برجونا ۲ اورغ.
 دالم ماس نو جوکد، ما'نسي كهوړ ۲ بايق درهاکد کا توهن، فالېغ
 کي سمه هق لائين کنتي توهن، فس تا'سير تورووت لريته دي
 لغسوغ. سبب توله، ييلا سملي کا زمان نبي نوح، سموا ما'نسي
 نو فونه بلاکد ده، سبب دي دوق تورووت ليکيران دغن نفو دي
 سنديري. دي فون دوق بوات جاهت، بوات چالوغ فس سموا
 لركارا هق کجي ۲.

۱۲ فس توهن نملق ده کات کجهاتن ما'نسي نو بايق کيتو
 لالو، سبب ليکيران دغن لراسان هاتي سموا ما'نسي نو، دوق
 ننتي نق بوات معصية سمور ۲. تافي اد سورغ هق توهن
 برکنن، پايت نبي نوح. فس توهن روبت کا نبي نوح، کات
 دغن سبب ما'نسي دوق بوات جاهت بايق کيتو لالو، توهن نق
 هافوس ما'نسي سموا دغن اير به بر جادي حکومن اتس دوسا
 دي.

“ لفس لد تو، توهن سوروه نبي نوح کات: بواتله سبواه کفل هق بر انتوق بري سلامت ديري مو سکالي دغن افق بيني مو. نبي نوح فون مولاي بوات سلالو سروف هق توهن سوروه تو.

“ دالم ماس دي دوق بوات کفل بر تو، نبي نوح فون دوق رویت بري تاهو کا اورغ رامې، کات هاري حکومن هق توهن دکت نق سملي ده. فس دي بري ايغت کا سمو اورغ ۲ تو کات، سبب توهن يغ مهاسوچي لاکي عاديل، سايت توله توهن متي کنا هافوس ماني سمو کران سمو ماني تو بوات دوسا. نبي نوح رویت جوکد چارا حال کاسه کباغ بلس هق توهن، کات توهن نا سوکد نق هافوس بري ماتي هاييس سمو ماني هق دوق کرس هاتي تو، تافي، کالو ماني تبغ دوق کرس هاتي لاکي، توهن متي کنا حکوم دي جوکد.

“ لفس تو، نبي نوح سوروه اورغ رامې تو توبه، نيکل کل کجهاتن دي تو، فس فالين کليق کا توهن يغ سا. فس نبي نوح سوروه اورغ رامې کي نا يک کا اتر کفل هق سيف ده تو، انتوق نق بوليه سلامت درفد حکومن به بر.

“ ولو بالس ۲ مان نبي نوح دوق سرو بري امران کا اورغ رامې فون، تافي نا ۲ اد سئورغ هابوق هق لرجاي، فالين توبه. فس نا ۲ اد سئورغ هابوق هق جوغ تريما هق توهن رویت تو. سبالين، سمو اورغ ۲ نو بوات مئنجين ۲ ماني کا نبي نوح.

۹۰ بيلا کفل بسر تو سوده ده، توهن سوروه نبي نوح دغن
انق بيني، سکالي دغن منتو دي، نايک ماسوق کا دالم کفل
سر تو. لس توهن سوروه نبي نوح باوا ماسوق جوکد بناتلغ ۲
کنف ۲ بلسا، جتن بتينا، نق بري جادي کو اتوا کلامين ۲.
لواق تو فون بوات اپکوت هق توهن سوروه بلاکد. تافي اورغ ۲
لاين دوق ايجيقي ۲ مابين ساج.

۹۱ تيبا ۲ سلفي ده هاري حکومن هق توهن لتق تو. لس
توهن، دغن کواس دي سنديري، کاتوف ليتو کفل هق سر تو
بري کجف. نبي نوح دغن کلوارک دي سکالي دغن بناتلغ ۲ هق
دوق دالم کفل سر تو، سلامت بلاکد ده. تافي سموا اورغ هق
تا ميوه دغر لغسوغ هق نبي نوح دوق روبت ده، دي کنا دوق
دلوار کفل تو. لس تو، توهن بري هوجن تورون هق لبت
سکالي، سلام املت فولوه هاري املت فولوه مالم تا برهنتي ۲.
اير تو دوق کهور ۲ نايک سمور، سهيگد جادي به سر سرات
دنيا.

۹۲ سموا اورغ هق دوق دلوار کفل سر تو فون لاري کا اير
به بلاکد، کي چاري تملت سلامت هيگد سلفي کا فونچق ۲
کونوغ هق نيگکي سکالي. لس کونوغ ۲ تو فون سلم هابيس.
تا اد تملت ده هق دي بولي نومفلغ انتوق نق بري دير دي
سلامت. لس سموا اورغ ۲ تو ماتي هابيس.

”سايت اف توهن بري سموا ماٺسي ماتي بالس تو ؟
سايت دي بردوسا. کران دوسا توله توهن مستي کنا حکوم دي
بري ماتي لمس اير.

”تافي اد جوک ساتو فواق حق بردوسا فس دي بوليه
سلامت فد حکومن تو. باٺيت فواق کلواريک نبي نوح تو. فس،
سبب اف فواق نبي نوح تو بوليه سلامت ؟ سبب فواق تو
ناٺيک ده کا اتس کفل بر حق توهن چادغ انتوق تعفت
فرليندوغن. سايت نو کلواريک نبي نوح بوليه سلامت ده. تافي،
اورغ^۲ حق بردوسا حق تاٺميوه دغر حق توهن روپت ده تو. فس
تاٺجوغ ناٺيک کا اتس کفل بر حق توهن دوق چادغ ده انتوق
تعفت فرليندوغن. سموا اورغ نو لون بناس هاييس.

”چريتا نبي نوح تو جادي چونتوه انتوق کيت سموا هيغکد
سملي کا هاري ني. سبب ماٺسي کيت سموا بوات درهاکد ده
کا توهن سروف دغن اورغ دماس نبي نوح جوکد. توهن يغ
مهاسوچي تاٺبراو به. دي مستي کنا حکوم کا اورغ حق بردوسا.
جائن کيت بوات سوکد^۲ ماٺين، کات حکومن تو ناٺکنا کا اتس
کيت، سروف اورغ رامي دوق کات زمان نبي نوح تو.

”فد ماس تو، توهن کياغ بس کا ماٺسي حق بردوسا،
فس چادغ تعفت فرليندوغن انتوق ماٺسي، ياٺيت کفل بر، نق
بري بوليه سلامت کا ماٺسي حق بردوسا سموا، اصلکن دي فاليلغ
توبه، لرچاي کا حق توهن روپت، فس جوغ کي ناٺيک کا اتس
کفل تو.

”هاري نبي فون سروف تو جوڳڊ. اد ساتو نعمت فرليندوڳن
 ساج هق مائسي ڪيت بوليہ ڪي توملغ، باروله نقي بوليہ سلامت
 درفد حڪومن، پائيت، ڪيت ڪنا ڪي ڪو‘ جالن هق توهن سنديري
 دوق چادغ ده. لس ڪيت سموا نبي ڪامق بالس مان ؟ نقي ڪا
 دق بري لس ديري درفد حڪومن هق توهن ؟ ڪالو نقي، چاريله
 نعمت فرليندوڳن هق توهن چادغ ماري ده تو انتوق مائسي
 ڪيت سموا.

”هه برهنتي سکت نبي دولو چارا حال جالن سلامت تو، تافي
 ڪيت نقي رويت هوبوغ لاکي دالم فلاجران ۲ دافن فول.

فلاجران 5

چارا حال نبي ابراهيم

۱۰ ۱. براتوس ۲ تاهون لفس لد به بر، باروله تيمبول نبي ابراهيم. دي جادي كتورونن نبي نوح، هق فچه ماري کو، شيم، اتق سولوغ هق نبي نوح. نام نبي ابراهيم تو ترمشهور سملې کا ماس لاني فون، سبب دي تو برکنتوغ دغن توهن لس هارف سمات ۲ کا هق توهن رویت.

۱۱ لد ساتو هاري، توهن سوروه نبي ابراهيم براليه درلد نملت اصل هق دي. توهن کات: مو توبیت کيله، ابراهيم، درلد تانه اير مو. نيکلکله اديق براديق مو، دغن رومه تفکد ايه مو. مو کنا هادف کي کو، نکري هق اکو نق تنجوق کلد مو. اکو نق بري كتورونن مو جادي بايق، لس كتورونن مو تو جوکد نق جادي بلسا يغ مليا کو، دافن. اکو نق تورون رحمة اتس مو، لس اکو نق بري تيمبول نام مو. اورغ ۲ لاين فول نق تربما رحمة اکو دغن کران مو. اکو نق تورون رحمة اتس اورغ هق مينتا تورون رحمة اتس مو، تافي اکو نق مرکد لس جاتوه حکوم اتس سمو اورغ هق سومفه کلد مو. لس سمو بلسا مانسي ددنیا نق بوليه تربما رحمة اکو کو، جالن مو، توهن کات.

۱۲ ولو فون نبي ابراهيم تا تاهو توهن نق باوا دي کي کو، مان، تافي دي نوروټ سلالو لريته توهن، لس توبیت کي، بوات

سموا فرکارا ايکوت هي توهن سوروه ده.

“ سوغکوه فون توهن جنجي ده کا نبي ابراهيم، کات ابراهيم نق بوليه کتورونن بايق، تافي نبي ابراهيم دوق نتي لام، هيفکد سمفي دي دغن يني دي ساره تو توا ده، تا بوليه انق لاکي، سبب توهن نق سودي ايمان دي. بيلا عمور لبي ابراهيم لافن فولوه تاهون لبيه ده، دي فون تالیه صبر ده لس بريني سورغ لاکي، نام ستي هاجر، لس بوليه انق جتن سورغ دغن ستي هاجر تو، نام اسمعيل.

“ لسر فد تو فول، تکه نبي ابراهيم عمور سمبلن فولوه سمبلن تاهون، توهن رویت کا نبي ابراهيم، کات: مو نق بوليه انق جتن سورغ لاکي، تافي دغن ساره، يني توا مو تو. لس توهن کات: دغن انق توله اکو نق بري سملرن سموا فرجنجين هي اکو جنجي ده دولو تو.

“ تافي نبي ابراهيم براس ترجيران، سبب دي نو توا سالت ده. يني دي ساره تو فون عمور سمبلن فولوه تاهون ده. سايت تو، نبي ابراهيم فون ميتتا دعا دغن توهن، کات: اوه، يا توهن کو، مدهمداهن بريله انق کو اسمعيل تو بوليه تريما سموا رحمة سروف هي توهن جنجي ده دولو تو ! توجوان نبي ابراهيم بردعا بالس تو، دي نق سوغکوه ۲ بري اسمعيل له، سکالي دغن کتورونن دي، هي بوليه تريما سموا رحمة هي توهن جنجي ده تو.

٧٥ تالې توهن جواب کات: اکو دغر ده هق مو مینتا
انتوی اسمعیل تو. اکو نق توروون رحمة اتس اسمعیل جوکد، نق
برې دې بولیه انق بايق، لس کتورونن دې فون نق کهور ۲ رامې
کې. لس راج دوا بلس اورغ فون نق توروون ماري کو' دې
جوکد. بلغا دې فون نق جادي نام نیلکې، توهن کات.

٧٥ چرف ده کهندق توهن نق برې سموا کتورونن نبي
ابراهيم کو' اسمعیل تو بولیه ماسوق مفهادف توهن لس بولیه
ترېما رحمة، سروف دغن نبي ابراهيم مینتا ده تو. تالې اد
ساتو فرکارا هق توهن تا'برې فنوه سموا کهندق نبي ابراهيم تو.
ولو فون توهن نق توروون رحمة بايق کا اتس سموا انق چوچو
نبي ابراهيم کو' اسمعیل سروف تو، تالې کهندق توهن
سوځکوه ۲، نق برې جادي سمرن سموا فرجتجين دې دغن نبي
ابراهيم دولو ۲ تو، کو' جالن لا'ین، یا'یت کو' جالن انق هق
نبي ابراهيم نق بولیه دغن ساره، بيني توا دې تو. توجوان
توهن تو، نق برې سموا بلغا ما'نسي ددنیا بولیه ترېما رحمة
کو' جالن کتورونن انق نبي ابراهيم دغن ساره.

٧٥ بیلا نبي ابراهيم دکت نق سمفي صمور سراتوس تاهون،
باروله دې بولیه انق دغن ساره، لس لتق نام دې اسحاق. بالس
توله توهن سودې ده ایمان نبي ابراهيم. تالې، لس فد تو
فول، توهن نق سودې ایمان نبي ابراهيم سکالي لاکې، برې لیه
تروق فد دولو لاکې.

۱۵۰ توهن سوروه نبي ابراهيم کات: هي ابراهيم، اميقله انق مو هق مو کاسيه سوڻکوه ۲ تو، باوا' دي کي کو' کليواسن موريه، سمفي کا ساتو بوکيت هق اکو نق تنجوق، فس سمليه انق مو تو برې جادي قربان انتوق اکو، فس باکرله دي برې هابيس.

۱۵۱ ولو فون فنجوبان تو نروق کيتو لالو، تافي نبي ابراهيم بوات توروٽ جوکډ. ايسوق ڦاکي ۲ دي نوبيت کي سلالو، برجالن کا تمفت هق توهن سوروه تو.

۱۵۲ با سمفي کا کاکي بوکيت موريه تو، نبي ابراهيم سوروه همب ۲ دي توڼگو ديتو. فس دي دغن انق ساج نا'يک کا اتس بوکيت هادف کي کو' تمفت هق توهن فليله ده. تکه دوا برانق تو دوق برجالن، انق فون تان کات: يا ايه، تيفوقله ! بارا الهي اد، کايو هق نق بوات باکر فون اد، تافي مان کيس هق نق بوات قربان ؟

۱۵۳ نبي ابراهيم جواب کات: نا'الله، انق. توهن سندبرې نق برې کيس بوات قربان انتوق دي.

۱۵۴ بيلا دوا برانق تو سمفي کا تمفت هق توهن تنجوق تو، نبي ابراهيم فون بوات تمفت قربان. بيلا سوده ده تمفت تو، دي فون ايکت انق دي، اټکيت نا'يک اتس تمفت قربان تو.

لفس تو دي امبيق فيسو نځ سمبله. با موليځ، ملايکه هڅ توهن
نو لځکيل کا نبي ابراهيم، لارځ دي کات: هي ابراهيم ! جاغن
بوات اف۶ کا انځ مو تو، سبب توهن تاهو ده کات مو طاعة
سولکوه کلد دي. توهن نمفځ ده کات، ولو مو سايلځ سکالي
فون، مو جوځ نځ قربان جوکد انځ هڅ مو کاسه تو.

“ ابراهيم فون بله تيلوق، لمفځ اد سټکور کيس جتن
دوق لکت تندوق دفوهون کابو ديتو. هاتي نبي ابراهيم فون
لنوه دغن فوجين۲، فس دي امبيق سلالو کيس تو، بوات قربان
کنتي انځ دي. انځ دي تا۶کنا ماتي سبب کيس تو هڅ ماتي
کنتي انځ دي.

“ لځکارا۲ نو اد فلابده بري کيت بوليه لهم چارا حال جالن
هڅ توهن بوليه امفون دوسا مانسي کيت. توهن بځ مهاسوچي
تو، دي بنچي کا دوسا۲ کيت، فس مستي دي حکوم کران
دوسا۲ کيت نو، تا۶لادن دغن کيت توبه، ميتا۶ امفون ساج.
دوسا۲ نو مستي کنا هافوس دولو، باروله توهن بوليه تريما
کيت. دوسا۲ نو، کيت سنديري نځ هافوس تا۶ليه. تافي اد
جالن بوليه هافوس دوسا کيت تو، هڅ توهن سنديري چادغ ده.
سروف دغن انځ نبي ابراهيم تو بوليه سلامت، تا۶کنا ماتي سبب
توهن بري سټکور کيس جتن هڅ بوليه ماتي کنتي دي، سروف
نو جوکد توهن چادغ ده سټورځ جوړو تولوځ بري سلامت هڅ
جوځ تريما حکومن، ماتي کنتي کيت !

”چرف ده، کيت مستي کنا اد سئورغ جورو سلامت هق جوغ ماتي کنتي کيت، باروله توهن نق بوليه هافوس دوسا ۲ کيت. تالفي، اورغ جورو سلامت نو مستي کنا جادي اورغ هق سوچي سمات ۲. کالو دي نو اورغ بردوسا جوکد، دي کنا نلکوغ حکومن انس دوسا ۲ ديري دي سنديري، فس سايت نو دي نالبي نلکوغ حکومن دوسا کنتي اورغ لابين.“

”اد کا دق، اورغ جورو سلامت هق سوچي سمات ۲ سروف تو ؟ اد ده! نق ناهو کا دق، سياف دي اورغ تو هق اد کواس فس جوغ نلکوف ماتي کنتي کيت سموا ؟ کالو نق ناهو، هوبوغ ملاجي لاکي. دفلاجران ۲ دالمن نق رويت بري ناهو چارا حال اورغ جورو تولوغ بري سلامت نو.“

فلاجران 6

چارا حال نبي موسى

۱۰ نبي موسى جادي سورغ فمېمېن هق مليا سوځکوه. دي باوا' بريو ۲ اورغ توييت فد نکري مصر برجالن کي کا نکري کنعان. فواق دي تو لالو کي کو' فادغ فاسير دکليواسن بويکيت ۲. نعلت هق فايه چاري ماکن، لس لرجالن دي تو ماکن ماس امعت فولوه تاهون. ترجيران سوځکوه ! نافي دغن کران فرتولوغن توهن، نبي موسى بويه برجاې.

۱۱ نبي موسى لاهير دنکري مصر، نافي ايپو باف دي بغا اسرائيل، بايت کتورولن نبي ابراهيم کو' اسحاق. فد ماس تو سمو بغا اسرائيل جادي همب فرعون، بايت راج هق دوق مرېته دالم نکري مصر. راج تو ساعت ۲ طاليم. فد سانو ماس دي سوروه بونوه سمو بودق ۲ جتن بغا اسرائيل هق بارو برانق. کبتولن، فد ماس تو جوک، نبي موسى فون برانق.

۱۲ ايپو باف نبي موسى فون چاري جالن لق سوسوف انق، تاکوت کنا بونوه. دي بويه سوسوف دالم رومه دي سنديري هيفک سلفي عمور انق دي تو تیکد بولن. ييلا نعلق کات تاليه سوسوف ده، دي فون چاري جالن لايين فول. دي بوات باکول دغن کرچوت، چومور مېق کايو هيفکدير تاليه ماسوي، لس دي اميبي انق، لق دالم باکول تو، لس تودوغ. لس تو دي

امبيی کي لتی دالم فوهون کرچوت هی تومبوه دالم ایر دتلفی
سولفی، فس سوروه کاکتی بتینا نبي موسی ننתי تیلوق جاوه ۲۰۰ اف
لق جادی کا ادبی دی تو.

۴۰ کبتولن، انقی بتینا فرعون، راج نکری مصیر تو، کي
مندي کا سولفی. دي فون نملق باکول تو، فس سوروه دایغ ۲
دي کي امبيی. بیلا دي بوک باکول، دي نملق بودق هالوس
دوق تریاق، بوات بری انقی بتینا راج براس کیباغ بلس. دي
تاسیر بری باف دي بونوه، سبب تو انقی راج سوروه چاری
فلاسوه انتوق بودق تو، فس کاکتی بتینا نبي موسی تو کي چاری
مق دي سندیری بری جادی فلاسوه! فس انقی راج سوروه فول،
کات بیلا بودق تو بر ده، کنا باوا کي کا استان، سبب انقی
راج لقی فیرا سروف دغن انقی دي سندیری.

۴۱ بالس توله دیدیلکن نبي موسی سروف دغن انقی راج
مصیر. دري هالوس هیفکد سلفی بر، دي بولیه مطاجی دغن
سلفرن، فس دي بیجی لندي سولکوه. ولو فون کدودولکن دي
سروف انقی راج مصیر. تالی نبي موسی تاهو ده کات دي ني
بلس اسرائیل، بوکن بلس مصیر. بیلا دي توبیت کي تیلوق
کهیدولن اورغ بلس دي سندیری، دي فون نملق کات بلس دي
تو کنا پاڻ سولکوه ۲، فس کنا فلسا بوات کرج هی برت ۲.

۴۲ فد ساتو هاری، نبي موسی تیلوق سئورغ مصیر دوق کودم

سمفي ماتي سٽورغ همب هق جادي بلسا اسرائيل. نبي موسی فون نق بالس بوات سروف تو جوڪڊ. دي فون فاليلغ ڪيري، فاليلغ ڪالن، نملق نا^۱اد اورغ ده، فس دي بونوه سلالو اورغ مصير تو. تالي، ولو بالس مان فون، خبر تو سمفي ڪا تليفا راج جوڪڊ. راج فون موربه سوڱڪوه^۲. دي تربته مڪر^۲ دي، سوروه بونوه نبي موسی. سايت تو، نبي موسی ڪنا لاري ڪي ڪا نڪري ميديان، فس دي دودوق دسيتو سلام امفت فولوه تاهون.

^{۷۰} فد ساتو هاري، تله^۲ نبي موسی دوق ليرا ڪمبيغ بيريلغ دڪليواسن بوڪيت طرسينا دالم نڪري ميديان تو، تيبا^۲ دي نملق سروف افي هق دوق مبالا دلوھون ڪايو. نبي موسی فون براس ترجيران، سبب افي تو فليق، دوق مبالا، تالي فوھون ڪايو تو نا^۱هاغوس سيڪيت هابوق! نبي موسی فون ڪي نق تيلوق لركارا هق فليق تو. با دي ڪي ماسوق دڪت، دي بويي سوارا دوق لفڪيل دي دلوھون ڪايو تو، ڪات: هي موسی! مو جالمن ماسوق ماري دڪت نملت ني. چابونله سليفر مو، سبب نملت هق مو دوق برديري ني نملت هق سوچي!

^{۷۱} نبي موسی فون سجود سلالو ڪا توهن دتمفت تو. لس تو توهن رويت ڪا نبي موسی، ڪات: اڪو دغر ده سوارا اورغ^۲ بلسا اسرائيل هق جادي همب تو، دوق برادوه سبب اورغ^۲ مصير تو بوات پاڻ ڪا دي. فس اڪو نق لس ده سوا بلسا اسرائيل تويت ڪي درلد نڪري مصير. فس، توهن رويت لاڪي

کا نبي موسى، کات: باغونله، موسى. اکو سوروه مو کي
برجومفا دغن فرعون، يايت راج نکري مصير تو، کران موله هق
کنا باوا' سموا لواق اسرائيل توبيت لد نکري مصير.

" تافي نبي موسى کات: يا توهن کو، بالس مان اورغ
سروف اکو ني بوليه مفهادف راج نکري مصير، لس بالس مان
نق بري بوليه باوا' سموا لواق اسرائيل توبيت لد نکري مصير تو؟

" توهن فون جواب کات: اکوله هق نق جامين اتس
فرکارا ۲ تو، لس اکو نق دوق اد سکالي دغن مو سعمور ۲.
لس، توهن کات، لس لد مو باوا' توبيت ده سموا اورغ ۲ تو،
مو نق ماري فول سجود سمبه دافن اکو دبوکيت طرسنا ني.
الس توله توهن جواب کفد نبي موسى.

" نبي موسى فون توروٹ فرينته هق توهن، کي کا نکري
مصير، لس مفهادف راج نکري تو، مبتا' بري لس سموا اورغ ۲
اسرائيل توبيت کي درلد نکري مصير. تتافي راج تو تا'امبيق
برت. دي تا'لرجاي کا توهن بلغ سا، سبب توله دي تا'امبيق
فادول سيکيت هابوق کا فرکارا هق توهن سوروه، لس دي
تا'سير لس اورغ ۲ هق جادي همب دي. سابيت توله توهن بري
تورون بالا سفلوه فرکارا سرات نکري مصير.

" بالا هق توهن تورون دولو سمبلن فرکارا، يايت:

بالا دغن ابر جادي داره سرات نكري مصير، بالا دغن بکانتق ۲
 فنوه سرات نكري تو، بالا دغن اييو رغيټ ۲، بالا دغن
 لالت ۲، بالا دغن سموا بناتغ کنا ساکټ، بالا دغن سموا
 اورغ جادي بيسول، بالا دغن بلالغ، بالا دغن هوچن باتو،
 فس بالا بري کلف نيکد هاري نيکد مالم سرات نكري.

۳۵ توهن تورون بالا سميلن فرکارا تو کا اتس اورغ ۲ مصير،
 تافي راج نكري مصير تو دوق کرس هاتي لاکي، سميلن کالي
 ده نبي موسى کي بري امران کا راج، کات توهن نق تورون
 بالا، تافي راج تا'جوغ جوکد لفس سموا اورغ بفسا اسرائيل تو.
 سبب توله نبي موسى کي مفهادف راج کالي هق سود، فس دي
 روبټ سموا فرکارا هق توهن سوروه کا راج، کات سبب راج
 تا'هيرو لفسوغ، تافي دوق درهاکد سعمور کا توهن، سايت توله
 توهن نق حکوم نكري مصير دغن بالا هق تروق سکالي، يا'يت
 اورغ جتنن هق جادي انق سولوغ کنف ۲ رومه نفکد کنا ماني،
 جادي بالا بلغ کسفلولو.

۳۶ مالم تو جوکد، لبي موسى کات، فد ماس نغه مالم،
 ملايکه ملک الموت نق کي کا کنف ۲ بواه رومه دنکري مصير،
 نق بري ماني سموا اورغ جتنن هق جادي انق سولوغ، سولگووه
 فون توهن نق حکوم کنف ۲ رومه نفکد سرات نكري مصير، تافي
 توهن دوق چادغ ده جالن سلامت فد حکومن انتوق اورغ مان ۲
 هق جوغ توروټ جالن سلامت تو، فس توهن سوروه نبي موسى

رويت سڄا فرڪارا ۲ هق مٽي ڪنا بوات انتوق نق بوليه لفس
لد حڪومن تو.

۱۵ لبي موسى فون ڪي رويت سلاو ڪات: ڪنف ۲ ڪلوارڪ
مٽي ڪنا سڄيه سڳور بيريج بوات قربان، لس امبيق داره
دي ڪي چومور درومه ماسيغ ۲، ڪو ييڪا ۲ فينتو، باليق تو
باليق لي، لس انس ڪنوڻ فينتو ڪاتيقي. لس، نبي موسى ڪات:
داره هق بوات بالي تو نق جادي تندا ڪا ملا پڪه توهن ييلا دي
تورون حڪومن ڪا انس نڪري مصير، انتوق بري تاهو ڪات رومه
تو جادي رومه فواق مو. توهن رويت ده ڪات: ييلا اڪو تيلوق
داره دفينتو تو، اڪو نق بري لڳه رومه تو ڪي سلاو، تا امبيق
پاوا اورغ دالم رومه تو.

۱۶ اورغ ۲ اسرائيل فون سڄيه بيريج، چومور داره دفينتو
رومه دي ماسيغ ۲، بوات توروت سڄا فرڪارا هق توهن سوروه
تو. لد مالم تو جوڪد، ييلا ملك الموت مارې نق امبيق پاوا،
تا اد سيات دي ماتي دڪنف ۲ بواه رومه هق چومور داره ده
دفينتو. داره توله هق بري دي سلامت ده. تاهي اورغ ۲ هق
تا برڪنتوڻ دغن داره لس تا چومور داره دفينتو دي تو، دڪنف ۲
بواه رومه دي تو اورغ جنتن هق جادي انق سولوڻ ماتي بلاڪد.

۱۷ سايت حڪومن هق تروق سڪالي توله، بارو راج جوڻ لفس
فواق ۲ اسرائيل سڄا. سڄا اورغ ۲ تو فون تا ڪنا جادي همب
ده، بوليه توييت ڪي سلاو درلد نڪري مصير.

۱۵ سجاره نبي موسی ني هق رويت ماري ده اد فابده بري بوليه ارثي چارا حال جالن سلامت انتوق ماني سوا هيغكد سملي كا هاري ني.

۱۶ سروف توهن رويت بري تاهو دولو كات دي نق توروڼ بالا بري ماتي سوا اورغ جنتن هق جادي انق سولوغ دنكري مصير تو، سروف تو جوكد، توهن بري تاهو ده كا ماني كيت ماس لاني، كات اورغ مان ۲ هق بوات دوسا نق بوليه بالسن هق سوغ فانتوت، يائيټ حكومن ماتي. معنان، توهن كرت سين ده نق جاتوه حكوم ماتي اتس اورغ ۲ هق بوات دوسا تو، لس، لفس فد ماتي تو، توهن نق بري ماسوق لراكه، دوق سفكغ جاوه درفد توهن سملي سلام ۲.

۱۷ تافي، سروف ماس دولو توهن چادغ ده ساتو جالن نق بري سلامت كا اورغ اسراييل سوا تو، سروف تو جوكد ماس لاني، توهن چادغ ده ساتو جالن نق بري سلامت كا ماني سوا. لس كدوا ۲ جالن سلامت تو سروف. يائيټ، اورغ مان ۲ هق بركنتوغ دغن داره بيريل هق كنا قربان تو، اورغ تو بوليه سلامت. تافي اورغ مان ۲ هق تاوبركنتوغ دغن داره تو، كنا تريما حكومن ماتي.

۱۸ كيت سوا تاهو كا دق، داره بيريل هق كنا قربان تو، هق كيت بوليه بركنتوغ ماس لاني انتوق نق بوليه لفس فد حكومن اتس دوسا ۲ كيت تو، داره هق مان ؟ ننتي نق رويت بري چرف چارا حال جالن سلامت تو دفلاجران ۲ دافن.